

M224: Summa Theologiae

- 0,1 got vater êwic ist daz aneenge .
0,2 aller guoten dingen .
0,3 der gebunden hât den tiuvel .
0,4 des mankraft wonet überal .
0,5 siu ist obene . diu dinc rihtente .
0,6 unden ûf habente .
0,7 innen is siu si ervüllente .
0,8 ûzen umbe vâhente .
0,9 dâr an ist unverwandelheit .
0,10 âne unmuoze unde âne arbeit .
0,11 ein gotes kraft in drîn genenneden .
0,12 daz ist ouch gelâzen den sêlen .
0,13 dise habent ensament unde gescheiden .
0,14 rât gehügede mit dem willen .
0,15 dise drî genennede
0,16 sint iemer ensament wonente .
0,17 di genâde uns got dô verliez .
0,18 dô er unsich sîn âtem in blies .
0,19 dannen biren wir an der sêle .
0,20 mit gelouben daz êrlîche gotes bilede .
0,21 got vore bemeinte in disen zwein dingen
0,22 al sîn lop vûre bringen .
0,23 daz er sî gewaltic unde guot .
0,24 von den zwein er alliu wunder tuot .
0,25 er ist küninc keiser alwaltic .
0,26 unde vater wolewillic .
0,27 ze diu daz wir hinnen .
0,28 beide vûrhten unde minnen .
0,29 daz wir ouch von disen dingen .
0,30 iemer mügen sagen unde singen .
0,31 got alwaltic wolte erougen .
0,32 sîne krefte vile tougen .
0,33 der sîn wîsheit was der rât .
0,34 mit dem er elliu dinc geworht hât .
0,35 er was meister unde wercman .
0,36 sîn geziuc was vile lustsam .
0,37 er hiez werden viurîn engele .
0,38 geiste hêre joch vile edele .

0,39 wole gezam den edelen .
0,40 daz si alle vrî wæren .
0,41 daz si mêrre wünne habeten .
0,42 ob si in vrîlichen lobeten .
0,43 der engel allerhêrest under den .
0,44 Luzifer geheizen .
0,45 der was als ein insigele .
0,46 nâch deme vrône bilede .
0,47 sîne hêrschaf gegeben ime durch guot .
0,48 di kêrete er alle in übermuot .
0,49 er quat wolte sitzen norden .
0,50 sîn ebensezze des hôhesten .
0,51 durch daz was er verstôzen .
0,52 mit den volgenten ime genôzen .
0,53 dô wart des nîdes vater Luzifer
0,54 ein engel abetrünniger
0,55 vone der hoehe geviel er sô nidere
0,56 daz er niemer ne mac kumen widere .
0,57 wande er verloren hât den willen
0,58 ze allen guoten dingen .
0,59 dô di guoten engele al .
0,60 an sâhen den sînen val .
0,61 ze ire hêrren si sich gehabeten .
0,62 vorhtelîche si in lobeten .
0,63 durch daz wart in gegeben .
0,64 daz si iemer sulen ensament gote leben .
0,65 der selbe der dâr wîse unde almehtic ist
0,66 samfte ervulte er disen gebrist .
0,67 er geschuof ze der selben heime .
0,68 Adâm ûzer deme leimen .
0,69 dâ was er arzât der wise
0,70 daz wir bestuonten in paradîse .
0,71 wande jener nôz ze im dâr übele .
0,72 di sîne hêren edele
0,73 got erwac dô durh ebentiure .
0,74 di unser broede erde wider dem viure .
0,75 al des der mennische bedorfte .
0,76 in vinv tagen got vore worhte .
0,77 an deme sehsten tage worhte er in .
0,78 dise werelt al erwart durch in .
0,79 er habete in allen geschepfeden .
0,80 wünne oder bilede oder erzentuom
0,81 unser kûmftic ellende .
0,82 was er mit disen allen troestente .
0,83 daz si unsich des ermaneten .
0,84 daz wir heim ze der menden hügeten .
0,85 von unser hêrren geschepfede
0,86 gap er uns misselîche krefte

0,87 ie mit deme steine .
0,88 gap er uns gemeine herte der beine .
0,89 mit boume grüne .
0,90 der negele kîmen .
0,91 mit deme grase den vahse
0,92 daz iz selbe wahse
0,93 di sinne mit den vliegenden
0,94 swimmenten unde kresenten .
0,95 mit der engele betrahte .
0,96 di guoten von den übelen schîdente .
0,97 von den anegengen vieren
0,98 got wolte den mennischen zieren .
0,99 er gap ime von den viure .
0,100 gesiune vile tiure .
0,101 von den hoeheren luften
0,102 daz er mac gehoeren .
0,103 von den nideren daz er gestinken mac .
0,104 von dem wazzere gesmac .
0,105 der hende unde der vuoze berüere .
0,106 geliez er ime von der erde .
0,107 er geschuof in ûfreht daz er ûf sehe
0,108 dâ mite sîn wir gescheiden von dem vehe .
0,109 dô wart zestunt mit dem êresten manne .
0,110 suslich gedinge getân .
0,111 daz er ein einwîc rûnge .
0,112 mit deme gebote vûre mankünne .
0,113 ob er den sige erwürbe .
0,114 daz der mennische niemer erstürbe .
0,115 wande der unser kempfe dô gewweich .
0,116 leider er unsich alle besweich .
0,117 der engele minne unde gotes hulde .
0,118 verluren wir durch dise schulde .
0,119 der tiuvel wart über unsich gewaltic .
0,120 wir wâren zwüscheles tôdes schuldic .
0,121 sît kom ze der suone unde ze dem gewegede .
0,122 sun gotes barn der megede .
0,123 er nam von uns di toeticheit .
0,124 unde gap uns di goteheit .
0,125 wande er dâr enzwischen wolte wesen .
0,126 von des tôde wir alle sulen genesen .
0,127 dô der engel durch sîn übermuot geviel
0,128 über den gotes anden wart er weib .
0,129 Adâm ze dem gewalte gehôrte .
0,130 genâde gotes sît daz zerstôrte .
0,131 der megede sun wolte sînen genannen .
0,132 vone des vîandes gewalte gewinnen .
0,133 ane ime ze vile beginete er dô muose er wider geben .
0,134 daz er êr von schulden mohte haben .

0,135 Adâm der ander . wolte sînen genannen .
0,136 von rehte wider gewinnen .
0,137 er was von sünden reine .
0,138 er trat di torkelen alterseine .
0,139 dô âhtete der vîant di mennischheit .
0,140 dô dâr mite was verborren diu goteheit
0,141 daz querder vrumete er erhangen .
0,142 mit dem angele wart er gevangen .
0,143 Krist gap sîne unschulde vûre unser schulde .
0,144 tiure koufete er unsich wider ze der hulde .
0,145 got wolte daz kriuze in vier spalten .
0,146 dise werelt alle gehalten .
0,147 dô wart er unschuldic erhangen .
0,148 er habete vier ende dirre werelte bevangen .
0,149 daz er sîne erweleten alle ze ime zûge .
0,150 swenne er den vîant betrûge .
0,151 durch des ellenden schalkes nôt .
0,152 leit der gotes sun hônlichen tôt .
0,153 des tôdes kraft dô erstarbte .
0,154 mit deme lîbe er sîne holden wider gearbte .
0,155 Adâm entslief sîn sîte wart entgunnen .
0,156 Even wart dannen begunnen .
0,157 beines veste wîp von dem manne gewan .
0,158 mit vleisches broede ward der wehsel getân .
0,159 învart ouch in sîten diu arke was .
0,160 in der mankûne genas .
0,161 unser heil was . vruo bedâht .
0,162 Krist in kriuze joch in toufe hât si brâht .
0,163 von des wunden wir biren geheilet .
0,164 der uns ze feste mit broede wart verteilet .
0,165 driu des heiligen kriuzes ort .
0,166 sint des gelouben driu wort
0,167 dâr unden ist daz vierde .
0,168 der drîer ein gemeiniu rede .
0,169 der vriunde minnen unde der vîande .
0,170 breitete di verdeneten hende
0,171 an den sol ûfreht erstân .
0,172 swer mit gote wile volherten .
0,173 ze himele gedinge ob houbete ist .
0,174 daz enthebet al dîn tougene genâde Krist .
0,175 swer sô wolle Kristes wege volgen .
0,176 der trage sus sînen galgen
0,177 an dem er allen sînen willen .
0,178 von übelen werken müge gestillen .
0,179 sîn selbes werden ungewaltic .
0,180 gote gehôrsam unde êhaltic .
0,181 wile er danne alsô volstên .
0,182 âne ruom durch den gotes willen .

0,183 sô hât er den geistlîche gebiledet .
0,184 der unschuldic durch in wart gekriuziget .
0,185 diu gotes minne ist ein kûninginne .
0,186 under allen tugenden .
0,187 diu sulen leiten vorhte unde zuoversiht
0,188 vûre di gotes selbes anesiht .
0,189 vorhte vone helle dienet in schalkes wîse .
0,190 gedinge des erbes in sunes wîse
0,191 swenne si di minne volbringent .
0,192 unze si got erkennenent .
0,193 âne vorhte bestêt dâr inne
0,194 mit dem vater in sunes wîs diu minne .
0,195 got der diu minne ist hât uns offên getân .
0,196 wie wir di minne sulen hân .
0,197 er geschuof an uns diu gelit alle .
0,198 einander dieneute .
0,199 diu gelit diu dâr sint âne di êre .
0,200 der bedurften wir mêre .
0,201 nû ne mûgen di ougen verwîzen
0,202 di nidere den vuozen .
0,203 alsus biren wir under uns gelegen .
0,204 wie wir bruoderlîche sulen ensament leben .
0,205 wande got al mac unde al guot wile .
0,206 von danne wart der dinge sô vile
0,207 swie si unsich dunken misselich .
0,208 ze deme gotes lobe sint si alle gelîch .
0,209 ist zwîer lîbe mittelanc .
0,210 obene genâde undene gedwanc .
0,211 drôuwet uns ze der helle elliu diu geschafft .
0,212 diu dâr ist scharpf unde tarehaft .
0,213 swaz dâr ist semfte unde wûnniclich .
0,214 daz dienet al deme gedinge in daz himelrîche .
0,215 der vîant an den gotes vîanden
0,216 richet den gotes anden .
0,217 sînes undankes dienet er .
0,218 gotes holden . mit vorhten machet er .
0,219 er en mac niemannen bevellen .
0,220 wan mit sîn selbes willen .
0,221 unser erde ist er nâch schîbente .
0,222 di genâde gotes ûf ziehente .
0,223 alsô muoz er gote dienen .
0,224 ime selben ze wîze mêret er unser lôn .
0,225 nâch unser vorderen valle .
0,226 vervluochet wart diu erde ie mitalle .
0,227 daz wazzer habete got in ruoche .
0,228 er geschiet iz von dem vluoche .
0,229 unsich wolte er vone den meinen .
0,230 an der toufe gereinen .

0,231 di erde gewuosch diu sinvluot .
0,232 di ünde gewîhete der heilant unde sîn bluot .
0,233 daz gemischet von sîner sîten ran .
0,234 mit dem er unsich erlôste unde heim gewan .
0,235 Krist unser gîsel durh unsich in grabe lac .
0,236 zwô nahte unde einen tac .
0,237 sînes einen tôdes tac dô übervahet
0,238 unsers zwischelen tôdes naht .
0,239 in des êre man drî stunt besoufet
0,240 den man rehte getoufet
0,241 dâ sulen wir werden
0,242 sîn ebenbiledē ûf erden
0,243 jû der vorderen entgulten wir .
0,244 der vüresprechenten gelouben geniezen wir .
0,245 houbet ist erstântē der kristenheit .
0,246 des diu gelit alle habent underscheit .
0,247 er ne wile vürder niht ersterben .
0,248 vone diu sô ne mac zwischeligiū toufe werden .
0,249 der diu genâde ist der hât aber begunnen
0,250 unserme herzen eines brunnen .
0,251 der mac unsich alle gereinen .
0,252 ob wir di sünde lûterlîche weinen .
0,253 der dâr lônēt sîn selbes gebe .
0,254 der wile iegelich sîn gelit bringen daz iz enein lebe .
0,255 got selbe lêrte unsich kiusche unde diemuot .
0,256 gedult unde wesen wider übele guot
0,257 unde vremedez leit erbarmen .
0,258 lêren di tumben helfen den armen .
0,259 di wârheit beschirmen ungerne swerjen
0,260 vermîden diu laster joch werjen .
0,261 vesten gelouben haben joch gedinge .
0,262 ze der kristenlîchen minnen .
0,263 gotes wort gehoeren als iz ime gezeme .
0,264 sô wir in biten daz ouch er unsich verneme .
0,265 swie wir gevallen sô sol iz unsich riuwen .
0,266 unde sulen wir gote vile wole getrûwen .
0,267 der Dâviden tete lobesam
0,268 sît er Uriam verriet dem er sîne konen nam .
0,269 der deme schâchære sîne meintât verliez
0,270 unde ime daz himelrîche gehiez .
0,271 sô lange ouch der gotes drî stunt verlougenete
0,272 ist nû di himelslûzzele tragente .
0,273 ûzer der aschen erliuterete er unsich alsô daz glas .
0,274 des genâde was daz Paulus unde Maria genas .
0,275 gotes brût dû sêle adelvrouwe .
0,276 vorhte dû der ire diuwe .
0,277 der lîchame ist der sêle kamerwîp .
0,278 er mac ire verliesen den êwigen lîp .

0,279 diu sêle sol ire selber râten .
0,280 allez guot der diu gebieten .
0,281 siu sol ersterben der diuwe kint .
0,282 daz des lîchamen übeliu werc sint .
0,283 unde sol edeliu kint gewinnen .
0,284 di siu ze deme gotes erbe müge bringen .
0,285 der dâr ist beidiu got unde mennische .
0,286 der gibet urstende zwischelige .
0,287 di sêle læt er von den sünden erstân .
0,288 joch vile lûterlîche ruowe hân .
0,289 vone grabe erstênt noch liute vier slahte .
0,290 an der jungesten wahte
0,291 ze der urteile ne kument di wirsesten
0,292 di dâr sint vore verteilete .
0,293 di durchnehtigen sulen erteilen .
0,294 di dâr sint der zweier mittemen .
0,295 diu gotes urteile ist hier tougen
0,296 ze deme suontage ist siu offen .
0,297 manigen villet got mit sêre .
0,298 daz er sich ze deme guote kêre .
0,299 ob er sich danne bezzeren ne welle .
0,300 daz er in vore gerewe ze der helle .
0,301 ze jungest in offeneme zorne .
0,302 di helwen scheidet er von deme korne .
0,303 dâ sihet ein iegelîcher nâch sîn selbes wizzentheit .
0,304 an deme gotes sun ime selbeme liep . oder leit .
0,305 sæligen di ze der zesewen sint
0,306 iemer gotes kint .
0,307 den vater êret dâ ze himele der sun .
0,308 mit den er hât hier in erde gewunnen .
0,309 ensament in trinket er den wîn .
0,310 zeichen der êwigen menden .
0,311 mit den engelen sint si untôtlich .
0,312 mit in erbent si dâ daz himelrîche .
0,313 got ist ire lîp râwe unde minne .
0,314 alsô daz lieht ist der ougen wünne .
0,315 hêrre di dâr dient ist daz rîche .
0,316 wie mügen wir dir gelônen .
0,317 dû dâr nider genige ûf ze hebene den man .
0,318 der von sünden was gevallen .
0,319 dû dâr wesen woltest unser genôz
0,320 tragente unser bürden sô grôz .
0,321 nû hâst dû hêrre dînen milten rât .
0,322 allen dînen holden ze vröuwede brâht
0,323 daz dich unser erloesære allez daz lobe .
0,324 swaz dir ist under deme himele joch dâr obe .